

# INUIT ATAQATIGIIT

## Inatsisartuni



5. august 2019

UKA2019/128

Inatsisartut suleriaasianni § 33 naapertorlugu aalajangiiffigisassatut siunnersuut imaattoq saqqummiuppara:

**Annerpaamik 0,2 procentimik THC-mik akulinnik cannabisimik nioqqutissiat (tassani cannabisolia aamma eqqarsaatigalugu) inerteqqutaajunnaarsinnissaannik Naalakkersuisut suliniuteqaqqullugit Inatsisartut aalajangiiffigisassaattut siunnersuut.**

(Inatsisartunut Ilaasortaq Peter Olsen, Inuit Ataqatigiit)

### **Tunngavilersuut:**

Danmarkimi cannabisoliamik cannabisimiillu nioqqutissianik allanik annarpaamik 0,2 %-mik THC-talinnik tuniniaaneq pisisinnaanerlu inerteqqutaangillat. Aangajaarniutit pillugit nalunaarutip allannguutaa ulloq 1. juli 2018 aallarnerfigalugu atuutilermat tamanna pisinnaalerpoq.<sup>1</sup>

THC cannabisip akugaa aangajaartitsilersartog.

Cannabisolia naasumit hampemit issingerneqartarpoq. Nalinginnaasumik cannabisolia taamaallaat imaluunniit annertunerpaamik CBD-mik akoqartarpoq.

Nunarsuarmioqartigiit akornanni CBD-p napparsimajunnaarsitsisinnaaneramik iluaqutaasinnaaneranillu ilisimatusarneq ukiuni makkunani soqutigineqariartuinnarpoq. Immikkuualuttuni amerlanerni sunniutinik qularnaatsumik ersersitsisunik suli ilisimatusarnerit inernerannik piareersimasoaqqangilaq, taamaattoq ilisimatusarnerit inernerit arlallit isumalluarnarput. Misissuinerit CBD ilaatigut marniliornermik aseruuutoornerillu ilaannik, merianngunermut, ernumanermik nappaateqarnermut, sianiutinik qasusoornermi, psykosornermi, anniartuaannarnerillu ilaanni, Alzheimerernermi Parkinsonimillu napparsimanermi kiisalu kræfteqarnermi iluaqutsiisartog ilimanarsisippaat.<sup>2</sup>

WHO naapertorlugu CBD uerinartortaaqqangilaq.

<sup>1</sup> Tak. Danmarkimi nalunaarut 'bekendtgørelse nr. 665 af 1. juni 2018 om ændring af bekendtgørelse om euforiserende stoffer'.

<sup>2</sup> [https://www.who.int/medicines/access/controlled-substances/5.2\\_CBD.pdf](https://www.who.int/medicines/access/controlled-substances/5.2_CBD.pdf)

Taamaammallu Danmarkimi – aammalumi maani – cannabisoliap annertuumik soqutigineqarnera tupigisassaangilaq.

Nakorsaait ikittuinnaat cannabisimik nakorsaaitut manna tikillugu taaguuteqarsinnaalernissaminnut inissimalersimapput, Danmarkimili cannabisolia inerteqqutaangitsumik naturmedicinitut nerisalluunniit akuattut tuniniarneqarsinnaavoq.

Naalli Danmarkimi inatsisit naapertorlugit 0,2 % tikillugu THC-mik akulimmik cannabisoliamik pisisoqarsinnaagaluartoq, manna tikillugu taamaattut nunatsinnut eqqunnissaat inerteqqutaavoq.

Kalaallit Nunananni<sup>3</sup> cannabis kiisalu nioqqutissiaq sunaluunniit hampip naasortaanit issingerneqartoq inerteqqutaapput, tassani naasussat hampit hampetavillu, naasortat allunaasiornermi atorineqarsinnaasut kisimik pinnatik. Taamattaq aamma nioqqutissiat aangajaartitsisartumik THC-mik annikitsuaqqamik suunngitsumik akullit aamma pineqangillat.

Amerlasuut cannabisimik tunisassiat aangajaarnangitsut assigiinngitsut, tassani ingammik cannabisoliap, Danmarkimi pisiniarfanni pisiarineqarsinnaasup Kalaallit Nunaanut eqqutseqqusaanginnera paasiuminaatsillugulu naapertuutinngitsutut isigaat.

Uangattaaq taama isumaqarpunga. Ingammillu cannabisoliamik pisisinnaaneq, nunatsinni nappaalasunut amerlasuunut sunniutilimmik isumalerujussuussaaq. Cannabisolia tamanut iluaqutsiisinnaangilaq napparsimasorujussuuartunullu katsorsaasinnaassuseqarani. Inuilli napparsimasut cannabisoliap qanoq pitsaatigineranik oqariartortarnerat amerlasuunit iluaqutigineqarneranik ilimanarsisitsivoq.

Taamaammat cannabisimik nioqqutissiat (tassani cannabisolia aamma eqqarsaatigalugu) annerpaamik 0,2 %-mik THC-mik akoqartut inerteqqutaajunnaarsinnissaannik iliuuseqaqqullugit Naalakkersuisut peqquneqarnissaat siunnersuutigaa.

Partiit sinneri siunnersuummut tapersiiumaartut neriuutigaa.

**Pisortanut aningaasaqarnikkut allaffissornikkullu kingunissai:**  
1992-mi peqqinnissaqarfimmik akisussaannerup angerlaanneranit aangajaarniutit pillugit inatsit taamanili atuuttoq maani nunatsinni suli atuuppoq. Peqqinnissaqarfimmik akisussaalernitta kingorna, uagut nammineerluta aangajaarniutit pillugit maleruagassanik

---

<sup>3</sup> Tak. Danmarkimi nalunaarutit 'Bekendtgørelse nr. 559 af 9. november 1984 om euforiserende stoffer, som ændret ved bekendtgørelse nr. 53 af 13. februar 1986, bekendtgørelse nr. 18 af 5. januar 1989 samt bekendtgørelse nr. 567 af 21. august 1989'.

aalajangersaasussaaneq pigaarput. Nammineq malearuagassiornissatta tungaanut, maleruagassatoqqat 1992 sioqqullugu atuuttut – arlalitsigullu ullutsinnut naapertuukkunnaareersut suli atuupput.

Siunnersuummik akuersineq aanngajaarniutit pillugit inatsisip nutarternissaanut periarfissatsialaassaaq.

Siunnersuummik atulersitsineq aanngajaarniutit pillugit Inatsisartut inatsisissaattut siunnersuummik, kiisalu taanna naapertorlugu nalunaarummik suliaqarnissamik pisariaqalersitsissaaq. Allaffissornermi isumalluutit Naalakkersuisut tamanna aallaavigalugu atorfissaqartikkumaagaat, AC-ip ukiup affaanit ukioq ilivitsoq tikillugu naammassisinnaasaanit annertunerussaangitsut naatsorsuutigineqarpoq.

**Namminersorlutik inuussutissarsiortunut aningaasaqarnikkut  
allaffissornikkullu kinguneqaatit**

Cannabisimik nioqqutissianik annertunerpaamik 0,2 %-mik THC-mik akoqartunik nunatsinni inerteqqutaajunnaarsitsineq taamaallaat cannabisimik nioqqutissianik naturmedicinitut isigineqartunik nerisassanulluunniit akuutissanik ammaassinani, aamma nerisassiornermi pinnersaatinillu nioqqutissianik hampip naasortaanit issingikkanik taakkunanngaluunniit akulinnik nioqqutissianik ammaassisussaavoq. Tamanna soorlu aamma Danmarkimi pisimasoq.

**Innuttaasunut aningaasaqarnikkut allaffissornikkullu kinguneqaatit  
Soqanngilaq.**